

Армысың, өз-Жаурыз!

ЗАН

ZANMEDIA.KZ

✉ zangazet@mail.ru

№21 (3749)
21 наурыз 2025



газеті

Қоғамдық-саяси, құқықтық газет

ЛЕБІЗ

ҰЛЫСТЫҢ ҰЛЫ КҮНІ ҚҰТТЫ БОЛСЫН!

Құрметті әріптестер, оқырмандар!

Қазақстан Республикасы Судьялар одағының атынан Сіздерді Ұлыстың Ұлы күні Наурыз мейрамымен құттықтаймын!

Наурыз мейрамы – ежелгі заманнан қалыптасқан жыл бастау мейрамы. Бұл мейрам парсы, кавказ және түркі халықтарының арасында көктем мейрамы және жаңа жылдың басталуы ретінде тойланады. Наурыз – жыл басы ғана емес, табиғаттың жаңаруы, тіршіліктің жандануы, жарқын болашақтың бастауы. Бұл – халқымыздың тарихында ерекше орын алатын ежелгі дәстүрлі мейрам, татулық пен бірлік орнайтын, қоғамды шаттыққа бөлейтін кезең.

Ата-бабаларымыз бұл мейрамды ерекше құрметпен қарсы алып, салт-дәстүрлер арқылы оның мағынасын тереңдеткен. Наурыз – кешірім мен кеңшілік, ізгілік пен мейірімділік символы. Осы күні адамдар ренішін ұмытып, табысып, дастарқан жайып, Наурыз көже дайындайды, меймандар күтеді. Бұл – жан мен тәннің тазару мезгілі, жаңа бастамаларға дайындық.

Еліміз тәуелсіздік алғаннан бері Наурыз мейрамының мәртебесі артты, ұлттық құндылықтарымыз жаңғырып, қоғамда әділеттілік пен теңдік орнады. Мемлекет басшысының жетекшілігімен елімізде әр салада көптеген реформа жүргізіліп, мемлекетіміз халықаралық қоғамдастықта лайықты орнын ала бастады. Әрдайым алда тұрған қиындықтар мен ғаламдық дағдарыстарға қарамастан, Қазақстан өзінің әлеуетін арттыра отырып, экономикалық және әлеуметтік, саяси даму жолында үлкен жетістіктерге қол жеткізді. Бұл жетістіктерге негіз болған басты фактор – еліміздегі тұрақтылық, ұлт бірлігі және азаматтар арасындағы келісім. Осы тұрақтылық пен келісім біздің болашағымыздың іргетасы болып қалатыны сөзсіз.

Ұлыстың Ұлы күнінің құндылықтары сот жүйесінің негізі – әділдік, адалдық және заңдылықпен үндеседі. Еліміздің тұрақты дамуына және заң үстемдігін қамтамасыз етуге сот жүйесінің, оның ішінде судьяларымыздың атқаратын рөлі ерекше маңызды. Сот жүйесінің тұрақты дамуы – құқықтық мемлекеттің басты негізі, қоғамның әл-ауқатын арттырудың және мемлекетіміздің өркендеуінің кілті. Әділ сот төрелігі елдегі заңдылықты сақтауға, азаматтардың құқықтарын қорғауға және қоғамдағы әділдік пен теңдік принциптерін орнықтыруға бағытталған.

(Жалғасы 2-бетте)

(Жалғасы 2-бетте)

БҮГІНГІНІҢ БАС ТАҚЫРЫБЫ

ТАТУ ЕЛГЕ – ТЫНЫШТЫҚ ПЕН ТОҚШЫЛЫҚ НӘСІП



Ұлыстың Ұлы күні – Наурызды мерекелеу жылдан-жылға жанданып, жаңа заманмен бірге жаңа сипатқа ие болып барады. Осы аралықта мейрам елімізді мекендеген бүкіл халықтың, ұлт пен ұлыстың сағынып күтетін ортақ мерекесіне айналды.

ТАҒАЙЫНДАУ

ТӨРАҒАЛАРҒА СӘТТІЛІК!



Азат ІЗБАСАРОВ



Мақсұт ТЕКЕТАЕВ



Серік ТӨЛЕГЕНОВ



Алмат ЕРМАНОВ



Серікжан ҒАБДУЛИН

Ұлыстың Ұлы күні қарсаңында еліміздің бес облыстық сотына жаңа төрағалар тағайындалды. Қазақтың жаңа жылынан жұмысын бастағалы отырған төрағалардың жұмысына сәттілік тілейміз!

Азат Избасаров – Батыс Қазақстан облыстық сотының төрағасы

Алғашқы еңбек жолын Алматы қаласы және Алматы облысы ІІД-нің тергеушісі, тергеу бөлімінің бастығы қызметінен бастаған Азат Әмірбекұлы Алматы облысы Қарасай аудандық сотының судьясы, Маңғыстау облысының қылмыстық істер жөніндегі мамандандырылған ауданаралық сотының төрағасы;

Маңғыстау облыстық сотының судьясы қызметін абыроймен атқарған. Тағайындауға дейін Батыс Қазақстан облыстық сотының қылмыстық істер жөніндегі сот алқасының төрағасы болды.

Мақсұт Текетаев – Маңғыстау облыстық сотының төрағасы

Қызметін сот орындаушысы, аға сот орындаушысы болып бастаған Мақсұт Нысанбайұлы сот саласын-

да сатылап өскен білікті маман. Ол Талғар аудандық сотының төрағасы, Қызылорда облыстық сотының азаматтық істер жөніндегі сот алқасының төрағасы ретінде абыроймен еңбек еткен судья.

Серік Төлегенов – Павлодар облыстық сотының төрағасы

Заңгерлік білім алған соң сот хатшысы, сот приставы, Жоғарғы Сот аппаратының консультанты болған Серік Кеңесұлының сот саласындағы тәжірибесі жиырма жылдан жоғары. Астана қаласы Алматы аудандық сотының судьясы,

Ақтөбе қалалық сотының төрағасы, Алматы қаласы Алмалы ауданы №2 сотының төрағасы қызметін мінсіз атқарған ол тағайындауға дейін Павлодар облыстық сотының азаматтық істер жөніндегі сот алқасының төрағасы болған еді.

Алмат Ерманов – Қостанай облыстық сотының төрағасы

Алмат Нұрмұратұлы ширек ғасырдан бері сот саласында еңбек етіп келеді. Қызылорда облысы Қармақшы аудандық сотының, мамандандырылған ауданаралық экономикалық сотының судьясы

болған әріптесіміз еңбек жолын Қызылорда облыстық сотының судьясы, Атырау қалалық сотының төрағасы; 2020 жылдан бастап осы уақытқа дейін Қостанай облыстық сотының азаматтық істер жөніндегі сот алқасының төрағасы ретінде жемісті еңбек еткен.

Серікжан Ғабдулин – Солтүстік Қазақстан облыстық сотының төрағасы

25 жылдық судьялық өтілінің 17 жылын бірінші сатыдағы соттарда атқарған Серікжан Жәлелұлы кәсіби біліктілігі зор, беделі жоғары маман. Соттағы жұмысын 1999 жылы Петропавл қалалық сотының судьясы, төрағасы ретінде бастаған. Одан кейін Ақжайың аудандық сотының төрағасы, Солтүстік Қазақстан облыстық сотының судьясы, 2020 жылдан осы қызметке тағайындалғанға дейін – Ақмола облыстық сотының азаматтық істер жөніндегі сот алқасының төрағасы қызметін лайықты атқарып келді.

Соттың сан қырлы сынынан өтіп, білімі мен ілгерілігін шыңдаған төрағалар ел игілігіне қызмет етеді деп сенеміз.

